



Broj: KSI-17-142/23

Datum: 07.07.2023. godine

Na osnovu člana 25. tačka (g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21) i člana 25. stav (2) Poslovnika o radu Komisije za odlučivanje o sukobu interesa, postupajući po anonimnoj prijavi od 21.06.2023. godine protiv B. Đ., zastupnika u Skupštini Brčko distrikta Bosne i Hercegovine, kao nosioca javne funkcije, Komisija za odlučivanje o sukobu interesa na 58. sjedinici održanoj 07.07.2023. godine, donosi

## O D L U K U

Postupak za odlučivanje o sukobu interesa protiv nosioca javne funkcije, B. Đ., zastupnika u Skupštini Brčko distrikta Bosne i Hercegovine, neće se pokrenuti, obzirom da iz prikupljenih podataka i dokumentacije ne proizilazi da je u postupanju nosioca javne funkcije došlo do povrede odredaba Zakona o sprečavanju sukoba interesa u institucijama Brčko distrikta BiH, odnosno postojanja sukoba interesa.

### Образложење

Dana 21.06.2023. godine Komisija za odlučivanje o sukobu interesa zaprimila je anonimnu prijavu broj: KSI-17-142/23, protiv B. Đ., kao nosioca javne funkcije, zastupnika u Skupštini Brčko distrikta Bosne i Hercegovine, radi sumnje na povredu odredaba Zakona, odnosno postojanje sukoba interesa.

Naime, u prijavi je navedeno da je B. Đ., zastupnik u Skupštini Brčko distrikta Bosne i Hercegovine, na 45. redovnoj sjedinici Skupštine Brčko distrikta BiH učestvovao u diskusiji i predlagao određene zaključke vezano za zdravstvo iako je znao da je u direktnom sukobu interesa. Nadalje, da gospodin Đ. već dugo zloupotrebljava svoju poziciju poslanika i predsjednika Povjerenstva za rad, zdravstvo i socijalnu skrb iako dobro zna da je zaposlenik JZU i da je u direktnom sukobu interesa po više osnova. Takođe, zahtijeva od Komisije za odlučivanje o sukobu interesa da utvrdi sve relevantne činjenice, te ukoliko utvrdi postojanje povrede odredaba Zakona o sprečavanju sukoba interesa, primjeni odgovarajuće mjere.

Članom 2. tačka c) Zakona o sprečavanju sukoba interesa u institucijama Brčko distrikta BiH propisano je da je „nosilac javne funkcije“ izabrano ili imenovano lice u organima

i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno na čiji izbor i imenovanje suglasnost daje Skupština, odnosno Vlada, ukoliko drugim zakonom nije drugačije propisano.

Uvidom u Registar javnih funkcija i nosilaca javne funkcije, koje vodi Komisija, utvrđeno je da B. Đ. obavlja funkciju zastupnika u Skupštini Brčko distrikta Bosne i Hercegovine, na osnovu Uvjerenje Centralne izborne komisije, broj: [REDACTED], te je obavezan postupati u skladu s odredbama Zakona o sprečavanju sukoba interesa u institucijama Brčko distrikta Bosne i Hercegovine.

Članom 11. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije ne može učestvovati u procesu odlučivanja niti glasati po bilo kojem pitanju koje nosioca javne funkcije stavlja u sukob interesa što uključuje pitanja koja se direktno i indirektno tiču privatnog preduzeća u kojem taj nosilac javne funkcije ili s njim povezano lice ima finansijski i drugi interes, te bilo kojem drugom pitanju koje se direktno ili indirektno tiče povezanog lica.

Komisija za rad, zdravstvo i socijalnu zaštitu Skupštine Brčko distrikta Bosne i Hercegovine se sastoji od predsjedavajućeg i 4 člana, u kojoj je B. Đ. predsjedavajući iste. U opisu rada Komisije je da razmatra propise koji regulišu radne odnose, nezaposlenost, penzije, zdravstvo i socijalnu zaštitu, izvještava Skupštinu o statusu zdravstvene službe Distrikta i predlaže mjere za njeno poboljšanje, predlaže mjere za zaštitu starih lica i socijalno ugroženih kategorija građana Distrikta, razmatra i analizira godišnji izvještaj koji podnosi Fond za zdravstveno osiguranje Distrikta i predlaže mjere Skupštini, obavlja i druge aktivnosti određene Poslovníkom i odlukama Skupštine Brčko distrikta Bosne i Hercegovine.

Naime, uvidom u audio i video prenos sa 45. redovne sjednice Skupštine Brčko distrikta BiH, a koja se odnosi na tačku dnevnog reda „Razmatranje informacije o upućivanju pacijenata na liječenje van Brčko distrikta“ a koja je prijedlog Komisije za rad, zdravstvo i socijalnu zaštitu, utvrđeno je da je imenovani zastupnik, a kao predsjedavajući navedene Komisije, iznio i predložio mjere koje se tiču liječenja pacijenata van Brčko distrikta BiH, a sve u okviru opisa rada Komisije.

Članom 39. stav (1) Poslovníka o radu Skupštine Brčko distrikta Bosne i Hercegovine propisano je da Skupština formira komisije iz reda svojih članova radi pripremanja nacrtá zakona i obavljanja drugih dužnosti u skladu sa Statutom Distrikta i Poslovníkom, dok je članom 40. Poslovníka o radu Skupštine Brčko distrikta Bosne i Hercegovine propisano da Komisija donosi odluke, iznose mišljenje, podnosi prijedloge i izvještaje Skupštini o pitanjima koja su u njihovoj nadležnosti u skladu sa Statutom Distrikta, Poslovníkom Skupštine Brčko distrikta i odlukama Skupštine Brčko distrikta BiH.

Iz svega navedenog, a na osnovu prikupljenih podataka i dokumentacije, te uvidom u iste, utvrđeno je da rasprava i izlaganje B. Đ. zastupnika u Skupštini Brčko distrikta Bosne i Hercegovine, kao nosioca javne funkcije, na 45. sjednici, te diskusija, prijedlozi i određeni zaključci vezano za zdravstvo, shodno Poslovníku o radu Skupštine Brčko distrikta Bosne i Hercegovine, te shodno Zakonu o sprečavanju sukoba interesa u institucijama Brčko distrikta Bosne i Hercegovine, u ovom slučaju ne predstavlja osnov za povredu odredaba Zakona, odnosno da ne postoji sukob interesa jer se rasprava odnosila na probleme socijalno ugroženih kategorija građana vezano za njihovo upućivanje kao pacijenata na liječenje van Brčko distrikta, a što su prava i obaveze članova navedene komisije te da nisu utvrđene okolnosti koje

bi ukazivale na moguću povredu odredaba Zakona o sprečavanju sukoba interesa u institucijama Brčko distrikta Bosne i Hercegovine od strane nosioca javne funkcije.

Slijedom navedenog, Komisija je donijela odluku kao u dispozitivu.

Pouka o pravnom lijeku:

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 dana od dana prijema ove Odluke.

Predsjednik  
Komisije za odlučivanje o sukobu interesa

Admira Mujić, dipl.pravnik

Dostavljeno:

- Anonimnom podnosiocu, putem oglasne table
- Evidenciji
- Arhivi